



Avannaata
Kommunia



ILISIMATITSISSUTIGISAQ

01.03.2021

Sigguk Eqqaa

Avannaata Kommuniani ukiuunerani Sigguk eqqaanni assartuutit motorinik ingerlatillit nunaannarmi atorneqarneri pillugit ileqqoreqqusaq

KOLOFONI

Ukiuunerani angallannermut Avannaata Kommuniani Sigguk eqqaani nunaannarmi angallatit motoorillit ator-nissaat pillugit ileqqoreqqusaq

Ileqqoreqqusamut siunnersuut piffissami 24.03.2020-02.10.2020-mi Ilisimatusarnermut Avatangiisinullu Naalakkersuisoqarfimmi misissorineqarpoq

Ileqqoreqqusamut siunnersuut ulloq 06.11.2020-mi Teknikkimut Ataatsimiititaliamit akuerineqarallarpoq

Ileqqoreqqusamut siunnersuut ulloq 12.11.2020-mi Aningaasaqarnermut Ataatsimiititaliamit akuerineqarallarpoq

Ileqqoreqqusamut siunnersuut piffissami 16.11.2020-30.11.2020-mi tamanut ammasumik tusarniaassutaasimavoq

Ileqqoreqqusamut siunnersuut piffissami 11.01.2021-12.02.2021-mi Ilisimatusarnermut Avatangiisinullu Naalakkersuisoqarfimmi misissoqqinneqarlunilu inatsisilioriaatsimik misissuiffigineqarpoq

Ileqqoreqqusamut siunnersuut iluarsaassaq ulloq 19.02.2021-mi kommunalbestyrelsimit akuerineqarpoq

Ileqqoreqqusaq akuerisaq ulloq 01.03.2021-mi Suliffeqarnermut, Ilisimatusarnermut Avatangiisinullu Naalakkersuisumit aalajangersarneqarpoq

Ilassutissatut paasissutissiissutit:

Avannaata Kommunian

Rådhusi

Postboks 1023

3952 Ilulissat

avannaata@avannaata.gl

Tlf. 701800

Se også: www.avannaata.gl

<https://plania.avannaata.gl/ileqqoreqqusat-malittarisassallu/>

<https://naalakkersuisut.gl/kl-GL/Kundgoerelser>

Saqqqaani assilisaq Visit Greenlandimik isumaqateqarluni ilanngunneqarpoq, assiliisoq tassaalluni Filip Gielda

Avannaata Kommuniani ukiuunerani Sigguk eqqaanni assartuutit motorinik ingerlatillit nunaannarmi atorneqarneri pillugit ileqqoreqqusaq

Assartuutit motorinik ingerlatillit atorneqarneri pillugit Namminersorlutik Oqartussat nalunaarutaat nr. 10, 10. oktober 2013-imeersumi § 6, aamma § 7 imm. 1, § 9, imm. 1 aamma § 12 naapertorlugit aalajangersarneqarpoq:

Kapitali 1

Atuuffissai il.il.

§ 1. Avannaata Kommuniani Sigguk eqqaanni assartuutit motorinik ingerlatillit nunaannarmi atorneqarneri pillugit ileqqoreqqusaq una atorlugu aqutissat aamma ingerlaarfissat killeqarfiisa toqqarneqarnerinut malittarisassat aalajangersarneqarput.

Imm. 2. Siggummiipput Upernavik Kujalleq aamma Kangersuatsiaq. Nunaannarmi killeqarfia nunap assinganut ilanngussaq 1-imiippoq.

Imm. 3. Ileqqoreqqusami matumani nunaannarmi nunaminertat pineqartut tassaapput kommunimut pilersaarummi illoqarfiup nunaqarfiillu avataaniittut.

Imm. 4. Imartat, kangerluit, kuuttut tatsillu sikusarnerisa nalaani nunaannarmut ilaatinneqarput.

Imm. 5. Ileqqoreqqusaq Sermersuarmut iigartartunullu Sermersuarneersunut atuutinngilaq.

§ 2. Motorinik ingerlatillit ileqqoreqqusami pineqartut tassaapput angallatit motorillit suulluunniit sikukkut, aputikkut, qaqqakkut nunaannakkullu ingerlasinnaasut, matumani ATV-t, illiniliuutit qamuteralaallu ilanngullugit.

§ 3. Atuisussaatitaanermik nalunaaruteqartariaqartumik aqqusinerni, unittarfinni narsaatinilu il. il. angallanneq, pilersaarusionermut inatsit naapertorlugu, ileqqoreqqusami matumani atuutinngillat.

Imm. 2. Nakkutilliinermut oqartussaasut avatangiisinik pinngortitamillu nakkutilliinerannut, annaassiniarnerannut, politiit misissuinerannut, illersornissaqarfiup suliaqarnerannut assigisaannullu tunngasut ileqqoreqqusami matumani atuutinngillat.

Imm. 3. Sumiiffinni, angallatit motorinik ingerlatillit atorlugit angallannermut inatsisit allat aqutigalugit maleruagassiuiffiusuni, maleruagassiat sukkulluunniit killilersuiffiunerusut atuutissapput.

Kapitali 2

Nunaannarmi motorinik ingerlatilinnik atuineq

§ 4. Nunaannarmi angallatinik motorilinnik angalaneq taamaallaat kommunalbestyrelsip akuerisaatut ukiuunerani angallavissatut akuerisaani aamma ukiuunerani angallannermut aqutissiani akuerisaapput, takukkit ilanngussat 1-4.

Imm. 2. Angallannermut aqutissiani nalunaarsukkani aamma angallavissatigut angallatinik motorilinnik angalaneq taamaallaat ukiuunerani 1. oktobari - 31. maajimi pisinnaavoq.

Imm. 3. Angallatit motorillit nunakkoortillutik ajutoorsimassappata, naggorissutsimut nunamullu uuliakooratarsinnaaneq imaluunniit orsussamik aniasooratarsinnaaneq pitinnagit peerneqassapput. Angallatit motorillit Kommunalbestyrelsimit peeqquneqareernerisa kingorna peerneqanngippata, piginnittup akiligaanik Kommunalbestyrelsimit peersinneqarsinnaapput.

Kapitali 3

Angallannermut ataatsimoortumik aalajangersakkat

§ 5. Ukiuunerani assartuinnermut aqutissatut ukiuuneranilu angallavissatut toqqarneqartuni nunap qerinerani, apummik qallerneqarnerani aammalu naasunut nunamullu ajoqusiiviusinaanngitsumik angallavissaalernerani angalanissaq inerteqqutaanngilaq.

Imm. 2. Angallatinik motorimik ingerlatilinnik imeqarfiup killeqarfiata iluani angallanneq inerteqqutaavoq.

Imm. 3. Imm. 1-imi aalajangersakkat imaani sikukkut, kangerlukkut, kuukkut tatsikkullu angallanneq atuutinnngilaq.

§ 6. Nunaannarmi angalanermi naasunut aseruutaasinnaasumik sangupiloorfigineqasanngilaq, aallarsarfigineqassanngilaq unipiloorfigineqassananiluunniit.

Imm. 2. Kuuit sinaat uingarnillu kiisalu tatsit killingi, kuuit annerit kiisalu kangerluit ikaarneqartassapput, naasut nunallu ajoquserneqarfissarinngisaasigut.

Imm. 3. Angallanneq naasut uumasullu sianigalugit pissaaq. Nunami immamilu uumasut miluumasut illersornissaannut piniagarinissaannullu qaqumulluunniit atuuttutut nalunaarutit malittarineqassapput.

Imm. 4. Qimussinut ungasissusissat sapinngisamik minnerpaamik 10 meterinik ungasissuseqassooq.

Imm. 5. Angallannermi aqutit nunap assingatigut sapinngisamillu aqutitigut nalunaaqutsersuinikkut kommunimit isumagineqassapput.

Kapitali 4

Immikkut ittumik akuersissutit

§ 7. Pisuni immikkut ittuni ilanngussaq 1-4-p avataani assartuutit motorinik ingerlatillit atorlugit aqutissatut akuerisani angalanissamut kommunalbestyrelse immikkut ittumik akuersissuteqarsinnaavoq.

Imm. 2. Immikkut ittumik akuersissuteqartoqarnissaanut qinnuteqaat tunngavilersugaq angalanissaq pilersaarutaasoq kingusinnerpaamik sapaatit-akunnerinik sisamanik sioqqullugu kommunalbestyrelsimit tiguneqarsimassaaq aamma nunaminertanik imaluunniit aqutigisassanik takutitsiviussalluni.

Imm. 3. Kommunalbestyrelse immikkut ittumik akuersissuteqarnermut atatillugu naapertuuttutut isigineqarsinnaasunik piumasqaateqarsinnaavoq.

Imm. 4. Immikkut ittumik akuersissutit Avatangiisinut Naalakkersuisumut ilisimatitsissutigineqassapput.

Imm. 5. Imm. 1 aamma imm. 2 naapertorlugit akuersissutit sukkulluunniit kommunalbestyrelsimit imaluunniit Naalakkersuisunit allanngortinneqarsinnaapput utertinneqarsinnaallutilluunniit, immikkut ittumik akuersissuteqarnissamut piumasqaatit unioqqutinneqarpata, imaluunniit kommunalbestyrelsip Naalakkersuisulluunniit naliliinerat malillugu pissutsit pinngortitamut avatangiisinullu ajoqusiisinnaasut pineqarpata.

Imm. 6. Immikkut ittumik akuersissutit ukioq ataaseq tikillugu tunniunneqartarsinnaapput.

Kapitali 5

Nakkutilliineq il.il.

§ 8. Kommunalbestyrelsip nalunaarummi uani malittarisassat malinneqarnersut nakkutigissavaat.

Imm. 2. § 5-imi, imm. 1 aamma 2 angalanermut maleruaqqusat piffissap ilaani naammassineqarsimangippata kommunalbestyrelse inerteqquteqarsinnaavoq peqqussuteqarsinnaallunilu.

Imm. 3. Peqqussutit tassaasinnaapput angallaviit aalajangersimasut atorneqarnissaannik piumasqaatit.

Imm. 4. Inerteqqutit tassaasinnaapput sumiiffinni aalajangersimasuni piffissami aalajangersimasumi angallannerup tamarmi unitsinneqarnissaanik piumasqaatit.

§ 9. Nalunaarut manna naapertorlugu aalajangikkat tamarmik Avatangiisit innarlitsaaliorneqarnissaat pillugu Inatsisartut peqqussutaanni nr. 9-mi, 22. november 2011-meersumi kapitali 14-imi malittarisassat naapertorlugit naammagittaalliutigineqarsinnaapput.

Kapitali 6

Pineqaatissiinermut aalajangersakkat

§ 10. § 4-mik, § 5-imi aamma § 6-imi unioqqutitsineq akiliisitsinermik aamma/imaluunniit arsaarinninnermik kinguneqarsinnaapput.

Imm. 2. Piumasqaatinik, § 7, imm. 3 naapertorlugu aalajangersarneqartunik unioqqutitsineq akiliisitsinermik kinguneqarsinnaavoq.

Imm. 3. § 8, imm. 2-4 naapertorlugit peqqussummik imaluunniit inerteqqummik unioqqutitsineq akiliisitsinermik kinguneqarsinnaavoq.

Imm. 4. Ileqqoreqqusatigut akiliisitsinermik kinguneqartitsinermi, Kalaallit Nunaanni pinerluttulerinermi inatsimmi malittarisassat malillugit inatsisitigut pisinnaatitaasumut akisussaatinneqarsinnaapput.

Imm. 5. Imm. 1-4 naapertorlugit akiliisitsissutit Nunatta Karsianut nakkartinneqartassapput.

Kapitali 7
Atuutilerfissaq

§ 11. Iteqqoreqqusaq una atuutilissaaq ulloq 24.02.2021.

Avannaata Kommuniani Kommunalbestyrelsi, ulloq 19.02.2021

Palle Jerimiassen (sign.)

Borgmesteri